



Broj: 01-50-1-15-51/17
Sarajevo, 13. 9. 2017.

PRIMLJENO: 21-09-2017			
Organizaciona jedinica	Klasifikaciona oznaka	Redni broj	Broj priloga

ZAPISNIK
51. sjednice Predstavničkog doma
Parlamentarne skupštine Bosne i Hercegovine,
održane 7. i 13. 9.2017.

Sjednica je počela u 10,35 sati. Prisustvovao je 41 poslanik.

Odsustvo sa sjednice opravdao je poslanik Đorđo Krčmar.

Sjednici su prisustvovali članovi Vijeća ministara BiH.

Iz međunarodnih organizacija sjednicu su pratili predstavnici OHR-a, EUSR-a, USAID-a i Misije OSCE-a, iz nevladinih organizacija prisustvovali su predstavnik CCI-a, te predstavnici britanske, hrvatske i italijanske ambasade u BiH.

Sjednica je nastavljena 13.9.2017., s početkom u 10,10 časova. Prisustvovalo je 39 poslanika. Odsustvo sa sjednice opravdali su poslanici: Nenad Lalić, Saša Magazinović i Mirsad Mešić.

Sjednici su prisustvovali članovi Vijeća ministara BiH.

Iz međunarodnih organizacija sjednicu su pratili predstavnici OHR-a, EUSR-a i Misije OSCE-a. Sjednici su prisustvovali predstavnici britanske, hrvatske i italijanske ambasade u BiH, te zamjenik direktora Agencije za nadzor nad tržištem BiH.

Predsjedavajuća Doma Borjana Krišto rekla je da će poslanicima, u skladu s članom 167. Poslovnika, na početku sjednice, a prije rasprave o dnevnom redu, biti omogućeno postavljanje poslaničkih pitanja u usmenoj formi.

U skladu s članom 168. Poslovnika, najave za postavljanje poslaničkih pitanja u usmenoj formi dostavili su sljedeći poslanici:

- **Diana Zelenika** - ministru vanjske trgovine i ekonomskih odnosa BiH
- **Damir Arnaut** – predsjedavajućem Vijeća ministara BiH
- **Nermine Kapetanović** - ministru vanjske trgovine i ekonomskih odnosa BiH
- **Hanka Vajzović** – ministru komunikacija i prometa BiH

- **Aleksandra Pandurević**– ministru sigurnosti BiH
- **Dužanka Majkić**– ministrici odbrane BiH
- **Denis Bećirović** - ministrici za ljudska prava i izbjeglice BiH
- **Saša Magazinović**– predsjedavajućem Vijeća ministara BiH
- **Salko Sokolović**– predsjedavajućem Vijeća ministara BiH
- **Damir Bećirović**– predsjedavajućem Vijeća ministara BiH
- **Maja Gasal Vražalica**–Vijeću ministara BiH
- **Šemsudin Mehmedović** - ministru vanjskih poslova BiH
- **Nikola Lovrinović**– ministru civilnih poslova BiH
- **Zaim Backović**– Vijeću ministara BiH

Diana Zelenika

Pitanje postavljeno ministru vanjske trgovine i ekonomskih odnosa BiH: „Šta je uradilo Vijeće ministrara BiH, odnosno Ministarstvo vanjske trgovine i ekonomskih odnosa BiH na poboljšanju položaja poljoprivrednika, odnosno poljoprivredne proizvodnje u BiH, a imajući u vidu i zahtjeve poljoprivrednika putem svojih udruženja i u FBiH i u RS-u, a u formi uvođenja prelevmana na uvoz poljoprivrednih proizvoda, ograničenja na uvoz sezonskog voća i povrća kada domaćih proizvoda ima dovoljno na tržištu, uvođenja strožije kontrole na uvoz poljoprivrednih proizvoda s obzirom na činjenicu da se uvozi jako puno nekvalitetnih proizvoda, odnosno proizvoda koji ne mogu proći na tržištu EU, a završavaju na našem tržištu.“

Ministar vanjske trgovine i ekonomskih odnosa BiH Mirko Šarović dao je usmeni odgovor.

Damir Arnaut

Pitanje postavljeno predsjedavajućem Vijeća ministara BiH: “S obzirom na to da u Vašem ekspozeu kao jedan od prioriteta stoji, na strani 7, citiram – osiguranje ravnopravnosti građana i, opet citiram – ukidanje svakog oblika i vrste diskriminacije i segregacije, strana 26 Vašeg ekspozea, a Vaša ministrica za ljudska prava kaže da to nije nadležnost njenog ministarstva, moje pitanje je onda – Da li iko u Vijeću ministara radi na ovim prioritetima iz Vašeg ekspozea i ako radi, šta onda radi po pitanju stavova poput ovih načelnika navedene općine? (*Izjave načelnika sarajevske Općine Novi Grad o tome ko može ili ne može biti Bošnjak, a koje uključuju pseudonaučne tvrdnje poput onih iz najmračnijih vremena evropskog kontinenta.*)

Predsjedavajući Vijeća ministara BiH Denis Zvizdić dao je usmeni odgovor. Poslanik Damir Arnaut komentirao je odgovor.

Nermina Kapetanović

Pitanje postavljeno ministru vanjske trgovine i ekonomskih odnosa BiH: „Koje aktivnosti preduzima Ministarstvo vanjske trgovine i ekonomskih odnosa BiH kako bi pomoglo proizvođačima malina u Bosni i Hercegovini u postizanju kvaliteta proizvodnje i izvozu?“

Ministar vanjske trgovine i ekonomskih odnosa BiH Mirko Šarović dao je usmeni odgovor. Poslanica Nermina Kapetanović komentirala je odgovor.

Hanka Vajzović

Pitanje postavljeno ministru komunikacija i prometa BiH:

1. „Šta je do sada urađeno na realizaciji projekta „Zamjena i obnova oznaka i druge saobraćajne signalizacije kojima se označava granični prijelaz i njegovo područje, blizina granične linije, kao i način postavljanja tih oznaka i signalizacije“ za koje je prije tri – četiri godine urađena (i plaćena!) projektna dokumentacija, a prije gotovo dvije godine osigurana i sredstva od oko 800.000 KM?
2. Koje je aktivnosti Ministarstvo komunikacija i prometa BiH preduzelo u vezi sa sporenjima (ugovor, Pravobranilaštvo) vezanim za Centar za obrazovanje iz Širokog Brijega (koji se „suvereno“ bavi „stručnim osposobljavanjem prijevoznika i vozača“), te da li se Ministarstvu komunikacija i prometa BiH uplaćuje 5% sredstava koliko mu pripada od ukupne sume novca koju prijevoznici i vozači nužno uplaćuju Centru za obrazovanje u Širokom Brijegu?
3. Da li je i šta (ili išta) Ministarstvo preduzelo u vezi sa sredstvima (1,13 miliona KM) prikupljenim od certificiranja prijevoznika u međunarodnom prijevozu putnika i robe, koja su potom ostala blokirana na podračunu Vanjskotrgovinske komore BiH?
4. Da li je Ministarstvo išta (ili: da li je i šta) preduzelo u skladu s presudom Suda BiH vezano za homologaciju vozila, dijelova, uređaja i opreme, budući da taj problem (o kojem su i mediji pisali) datira iz prošlog mandatnog perioda, dakle još iz vremena ministrovanja Damira Hadžića?“

Ministar komunikacija i prometa BiH Ismir Jusko dao je usmeni odgovor.

Aleksandra Pandurević

Pitanje postavljeno ministru sigurnosti BiH: „Da li sigurnosne agencije na nivou BiH raspolažu podacima da su na području Trebinja boravila ili borave lica povezana s ekstremnim pokretima, koja predstavljaju opasnost za sigurnost? Također, da li nadležne agencije zadužene za sigurnost raspolažu informacijama da na području ovog grada postoje terorističke prijetnje?“

Ministar sigurnosti BiH Dragan Mektić nije prisustvovao sjednici, pa je poslanica Aleksandra Pandurević rekla da će pitanje postaviti na sljedećoj sjednici Doma kada bude predviđeno postavljanje poslaničkih pitanja u usmenoj formi.

Dušanka Majkić

Pitanje postavljeno ministrici odbrane BiH: „Poznato je da je Vijeće ministara BiH na sjednici od 23.12.2015. donijelo Odluku o remontu helikoptera serije MI u ukupnoj vrijednosti od 7,4 miliona maraka. Helikopteri, kao što je poznato, imaju ključnu ulogu u civilnim namjenama i pomoći lokalnom stanovništvu u slučaju elementarnih nepogoda. Moje pitanje glasi, prema informacijama kojima raspolazem, Ministarstvo odbrane BiH je na nedavno raspisanom tenderu za remont ta dva helikoptera izabralo litvansku kompaniju „Helisota“ koja nema odgovarajući certifikat za remont i ne može garantirati siguran i pouzdan rad helikoptera nakon remonta, moje pitanje, najkraće molim ministricu za odgovor – Kako je moguće da tenderska komisija posao dodijeli kompaniji bez certifikata, odnosno da

li je u sastavu tenderske dokumentacije predviđen jedan od uslova, a to je da kompanija koja se javlja na konkurs mora imati osiguran certifikat? I drugo, da li to znači da će se ponoviti slučaj prilikom neuspješnog remonta dva helikoptera, MI-8MTV i MI17, u Ukrajini kada su letjelice došle u lošijem stanju nego što su otišle na remont, iako je remont plaćen oko 10 miliona maraka?”¹

Ministrica odbrane BiH Marina Pendeš dala je usmeni odgovor. Poslanica Dušanka Majkić komentirala je odgovor.

Denis Bećirović

Pitanje postavljeno ministrici za ljudska prava i izbjeglice BiH: „Kada bi to na pamet palo nekome u mojoj rodnoj Tuzli ili u Sarajevu, Zenici, Travniku, Bihaću ili drugim gradovima Bosne i Hercegovine da na tuđoj imovini izgrade inat vjerski objekat? To kada bi neko pomislio, bio bi osuđen od samih građana tih gradova. Kako je moguće da mi, evo, 18 godina već ne možemo da riješimo taj problem? Zar je moguće da i nana Fata Orlović za života neće dočekati pravdu? Pa, ja mislim da je krajnje vrijeme da se to pitanje riješi, i to da se riješi do kraja ove godine, jer šta god kažete poslije 1. januara iduće godine bit će izborna godina pa će imati potpuno drugu konotaciju. I u tom smislu pozivam ministricu da odgovori i meni i javnosti – Šta je ovo ministarstvo konkretno preduzelo da se riješi ovaj problem? .../govornik se upozorava na vrijeme/... Ako može i ako ima te podatke da nam kaže da li postoji i jedan još primjer na teritoriji države Bosne i Hercegovine gdje je neko napravio inat vjerski objekat, a da je to na imovini nekog drugog građanina koji je druge vjeroispovijesti?”²

Ministrica za ljudska prava i izbjeglice BiH Semiha Borovac dala je usmeni odgovor. Poslanik Denis Bećirović komentirao je odgovor.

Saša Magazinović

Pitanje postavljeno predsjedavajućem Vijeća ministara BiH: „Kada će biti prikupljeni, usaglašeni i prevedeni odgovori na Upitnik, ako može neki termin da nam kažete koji je realan, i ako ne budu do tada, da li ćete, kao znak svoje odgovornosti, dati ostavku? Uz to bih Vas zamolio da nam kažete koji su problemi u prikupljanju odgovora, kako radi mehanizam koordinacije, kakav je odnos vlada entiteta, Brčko Distrikta BiH, da li oni utvrđuju stavove ili to rade eksperti? I, evo, ako ima još nešto što smatrate da je važno, a vezano za ovaj proces.“³

Predsjedavajući Vijeća ministara BiH Denis Zvizdić dao je usmeni odgovor. Poslanik Saša Magazinović komentirao je odgovor.

Salko Sokolović

Pitanje postavljeno predsjedavajućem Vijeća ministara BiH: „Evropski komesar Johaneshan 9.12.2016. uručio je predsjedavajućem Vijeća ministara BiH Denisu Zvizdiću 3.242 pitanja Evropske komisije.

¹ Izvod iz neautoriziranog transkripta 51. sjednice Predstavničkog doma PSBiH

² Izvod iz neautoriziranog transkripta 51. sjednice Predstavničkog doma PSBiH

³ Izvod iz neautoriziranog transkripta 51. sjednice Predstavničkog doma PSBiH

1. Da li imamo odgovore, odnosno da li imamo usaglašene odgovore na postavljena pitanja, s obzirom na to da je potrebno ujediniti sve općinske, kantonalne i entitetske odgovore u jedinstven bosanskohercegovački odgovor na zadatu temu?
2. Da li su osigurani prevodioci (za prijevod usaglašanih odgovora na zadatu temu)?
3. Koliko će (vremenski) navedeni proces trajati s obzirom na to da ne postoje jasno definirani rokovi?“

Poslanik Salko Sokolović rekao je da je njegovo pitanje isto kao i pitanje Saše Magazinovića, te da je dobio odgovor.

Damir Bećirović

Pitanje postavljeno predsjedavajućem Vijeća ministara BiH: „Dana 21.6.2017. održana je sjednica Skupštine dioničara Elektroprijenosa BiH a.d. Banja Luka i donesena je odluka o imenovanju vršilaca dužnosti izvršnih direktora - članova Uprave, po prijedlogu i na osnovu Odluke Upravnog odbora broj: 42-UO-08/2017, od 29.5.2017. Da li je ovo imenovanje zakonito, tj. da li je urađeno u skladu sa Zakonom o ministarstvima i drugim imenovanjima Bosne i Hercegovine te da li je traženo mišljenje Ministarstva vanjske trgovine i ekonomskih odnosa BiH, Ministarstva pravde BiH, Ureda za zakonodavstvo BiH i Ministarstva finansija i trezora BiH? Ako se utvrdi da se radi o nezakonitim imenovanjima, kada će ih Vijeće ministara BiH poništiti?“

Predsjedavajući Vijeća ministara BiH Denis Zvizdić dao je usmeni odgovor. Poslanik Damir Bećirović komentirao je odgovor.

Maja Gasal - Vražalica

Pitanje postavljeno Vijeću ministara BiH, Ministarstvu za ljudska prava i izbjeglice BiH i Ministarstvu sigurnosti BiH: „Šta je Ministarstvo za ljudska prava i izbjeglice BiH preduzelo u slučaju hrabrih žena iz Kruščice, osobito imajući na umu da je Ministarstvo nadležno za praćenje provođenja, izvještavanja o provođenju svih međunarodnih konvencija iz domena ljudskih prava? Također, da li ste preduzeli nešto kako bi ukazali svim relevantnim institucijama u Srednjobosanskom kantonu da je jedno od osnovnih ljudskih prava pravo na zdravlje, pitku vodu i odvodnju, te da zaštita okoliša apsolutno utiče i određuje stepen zdravlja svakog pojedinca i pojedinke? Šta ste kao resorno ministarstvo preduzeli u kontekstu objavljivanja, objavljenih tekstova, slika i video zapisa koji svjedoče o krajnje nehumanom, krajnje neprofesionalnom tretiranju žena od strane pripadnika specijalne policije Srednjo-bosanskog kantona?“⁴

Ministrica za ljudska prava i izbjeglice BiH Semiha Borovac dala je usmeni odgovor. Poslanica Maja Gasal - Vražalica komentirala je dati odgovor.

Šemsudin Mehmedović

Pitanje postavljeno ministru vanjskih poslova BiH: „Šta mislite preduzeti kao recipročnu mjeru prema zemljama koje u posljednje vrijeme maltretiraju građane BiH na granicama dugotrajnim kontrolama i provjerama koje traju po nekoliko sati i koje su potpuno diskriminirajuće prema određenim grupama građana BiH?“

⁴ Izvod iz neautoriziranog transkripta 51. sjednice Predstavničkog doma PSBiH

Ministar vanjskih poslova BiH Igor Crnadak dao je usmeni odgovor. Poslanik Šemsudin Mehmedović komentirao je dati odgovor.

Nikola Lovrinović

Pitanje postavljeno ministru civilnih poslova BiH: „Je li činjenica da ste 28.8.2017., odnosno 29.8.2017. uputili pismo ministru mora, prometa i infrastrukture u Vladi Republike Hrvatske Olegu Butkoviću kao obavještenje o pravnim smetnjama za izgradnju Pelješkog mosta? Ako jeste, interesira me na čemu ste utemeljili pravo da to učinite Vi, odnosno Ministarstvo civilnih poslova BiH? Nadam se da Vam je poznato ko u ime Bosne i Hercegovine vodi vanjsku politiku, te me zanima jeste li o ovome konsultirali Predsjedništvo BiH i Ministarstvo vanjskih poslova BiH?

U kom svojstvu i u ime koga ste Vi uputili Vaše obavještenje o pravnim smetnjama za izgradnju Pelješkog mosta?“

Ministar civilnih poslova BiH Adil Osmanović dao je usmeni odgovor. Poslanik Nikola Lovrinović komentirao je dati odgovor.

Zaim Backović

Pitanje postavljeno predsjedavajućem Vijeća ministara BiH, Ministarstvu vanjskih poslova BiH i Ministarstvu sigurnosti BiH: „Svjedoci smo učestalog dolaska visokih zvaničnika susjednih država na prostor BiH. Da li su ove zvanične posjete bilateralno dogovorene ili posjete po pozivu bez odgovarajuće državne pripreme ili samoinicijativno organizirane posjete?“

Ministar vanjskih poslova BiH Igor Crnadak dao je usmeni odgovor. Poslanik Zaim Backović komentirao je dati odgovor koji je zatražio i u pisanoj formi.

U vezi sa izmjenama i dopunama dnevnog reda sjednice, predsjedavajuća Bojana Krišto napomenula je sljedeće:

S dnevnog reda sjednice, na zahtjev Ustavnopravne komisije, **skinuta je tačka 5.** Prijedlog zakona o izmjeni i dopuni Zakona o ministarstvima i drugim organima uprave Bosne i Hercegovine, predlagач: Vijeće ministara BiH, zakon broj: 01,02-02-1-1610/17, od 4. 7. 2017. (drugo čitanje), skraćeni postupak, te je zbog neprisustva podnosioca skinuta **tačka 8.** Godišnji izvještaj Visokog sudskog i tužilačkog vijeća BiH za 2016., broj: 01,02-50-19-1611/17, od 4. 7. 2017.

Dopunjene su tačke 3., 5. i 6., te sada glase:

Tačka 3. Izjašnjavanje Predstavničkog doma o utvrđivanju novog roka za dostavu Izvještaja o Prijedlogu zakona o parlamentarnom nadzoru, predlagач: Privremena zajednička komisija oba doma Parlamentarne skupštine BiH za pripremu i upućivanje u parlamentarnu proceduru Prijedloga zakona o parlamentarnom nadzoru, broj: 01,02-02-1-1348/17, od 26. 5. 2017. (drugo čitanje);

Tačka 5. Izjašnjavanje Predstavničkog doma o utvrđivanju novog roka za dostavu Mišljenja o Prijedlogu zakona o dopuni Izbornog zakona Bosne i Hercegovine, predlagač: poslanik Denis Bećirović, zakon broj: 01-02-1-1074/17, od 21. 4. 2017. (prvo čitanje);

Tačka 6. Izjašnjavanje Predstavničkog doma o utvrđivanju novog roka za dostavu Mišljenja o Prijedlogu zakona o dopunama Krivičnog zakona Bosne i Hercegovine, predlagač: poslanik Denis Bećirović, zakon broj: 01-02-1-1503/17 od 15. 6. 2017. (prvo čitanje).

Predsjedavajuća je napomenula da je Kolegij Predstavničkog doma na 53. sjednici, održanoj 25.7.2017., odobrio zahtjev Ustavnopravne komisije za produženje roka za dostavu Mišljenja za Prijedlog zakona o dopuni Izbornog zakona Bosne i Hercegovine, predlagač: poslanik Denis Bećirović, zakon broj: 01-02-1-1074/17, od 21. 4. 2017., i Prijedlog zakona o dopunama Krivičnog zakona Bosne i Hercegovine, predlagač: poslanik Denis Bećirović, zakon broj: 01-02-1-1503/17, od 15. 6. 2017., do naredne sjednice Ustavnopravne komisije. Kako sjednica Komisije nije održana do današnje sjednice Doma zbog nedostatka kvoruma, Kolegij predlaže da se ova dva prijedloga zakona skinu s dnevnog reda ove sjednice Doma.

U raspravi su učestvovali: Damir Arnaut, Sadik Ahmetović, Nikola Lovrinović, Predrag Kožul, Saša Magazinović, Nermina Kapetanović, Momčilo Novaković, Mirsad Mešić, Zaim Backović, Mirsad Đonlagić i Dušanka Makić.

Sadik Ahmetović predložio je dopunu dnevnog reda s dvije tačke koje glase:

Informacija predsjedavajućeg Vijeća ministara BiH Denisa Zvizdića o aktuelnom stanju i odnosu Vijeća ministara BiH prema Parlamentarnoj skupštini BiH, te odnosu prema parlamentarnoj većini i Informacija o primjeni Okvirnog zakona o osnovnom i srednjem obrazovanju u BiH s fokusom na izučavanje maternjeg jezika, predlagač: poslanik Sadik Ahmetović, broj: 01-50-1-15-51/17, od 7.9.2017.

Nikola Lovrinović predložio je dopunu dnevnog reda inicijativom koja glasi:

„Na osnovu člana 8. i 70. Poslovnika Predstavničkog doma Parlamentarne skupštine BiH („Službeni glasnik BiH“, br. 79/14, 81/15 i 97/15), podnosim inicijativu da se u dnevni red 51. sjednice Predstavničkog doma Parlamentarne skupštine BiH kao 1. tačka uvrsti tačka pod nazivom: Evropski dan sjećanja na žrtve svih totalitarnih i autoritarnih režima u sklopu koje će se odati komemorativno poštovanje žrtvama i prihvatiti zaključak: „Predstavnički dom Parlamentarne skupštine BiH povodom 23. augusta, Evropskog dana sjećanja na žrtve svih totalitarnih i autoritarnih režima, izražava saučešće i pijetet prema ovim žrtvama, te zadužuje Vijeće ministara BiH da najdalje u roku od 30 dana Parlamentarnoj skupštini BiH dostavi tekst deklaracije koja će sadržavati odnos Parlamentarne skupštine BiH, odnosno Bosne i Hercegovine prema sljedećim aktima:

- Rezoluciji Vijeća Evrope 1096/1996 o mjerama razvrgavanja naslijeđa bivših totalitarnih komunističkih režima,
- Rezoluciji Vijeća Evrope 1481 (2006) o osudi komunističkih zločina,

- *Rezoluciji Evropskog parlamenta od 2. aprila 2009. godine o evropskoj savjesti i totalitarizmu*“, broj: 01-50-1-15-51/17 i 01-50-1-2064/17, od 23.8.2017.

Duška Majkić predložila je da prilikom glasanja o tački 3. Izjašnjavanje Predstavničkog doma o utvrđivanju novog roka za dostavljanje Izvještaja o Prijedlogu zakona o parlamentarnom nadzoru, predlagač: Privremena zajednička komisija oba doma Parlamentarne skupštine BiH za pripremu i upućivanje u parlamentarnu proceduru Prijedloga zakona o parlamentarnom nadzoru, broj: 01,02-02-1-1348/17, od 26.5.2017. (drugo čitanje), Dom ne produži rok za dostavljanje izvještaja.

Dom se prvo izjašnjavao o prijedlozima Sadika Ahmetovića. „Za“ prijedlog dopune dnevnog reda tačkom:

"Informacija predsjedavajućeg Vijeća ministara BiH Denisa Zvizdića o aktuelnom stanju i odnosu Vijeća ministara BiH prema Parlamentarnoj skupštini BiH, te odnosu prema parlamentarnoj većini" glasala su 23 poslanika (iz Federacije BiH 17, iz Republike Srpske šest), 12 „protiv“, četiri su bila „suzdržana“. Predsjedavajuća je konstatirala da je prijedlog Sadika Ahmetovića **usvojen**.

Zatim se glasalo o prijedlogu Sadika Ahmetovića za dopunu dnevnog reda tačkom koja glasi:

Informacija o primjeni Okvirnog zakona o osnovnom i srednjem obrazovanju u BiH s fokusom na izučavanje maternjeg jezika

„Za“ su glasala 24 poslanika (iz Federacije BiH 23, iz Republike Srpske jedan), 13 „protiv“, dva su bila „suzdržana“. Predsjedavajuća je konstatirala da nema potrebne entitetske većine. Kolegij kao komisija odmah je obavio usaglašavanje. Nije bilo saglasnosti. U drugom krugu glasanja, s 25 glasova „za“, 12 „protiv“ (iz Federacije BiH jedan, iz Republike Srpske 11) i dva glasa „suzdržan“, Dom **nije usvojio** ovaj prijedlog.

Prešlo se na glasanje o prijedlogu poslanika Nikole Lovrinovića za dopunu dnevnog reda. „Za“ prijedlog Nikole Lovrinovića glasalo je sedam poslanika (iz Federacije BiH četiri, iz Republike Srpske tri), 28 „protiv“ i četiri „suzdržana“. Dom **nije usvojio** ovaj prijedlog za dopunu dnevnog reda.

Što se tiče prijedloga poslanice Dušanke Majkić, predsjedavajuća je rekla da će se o tome izjasniti prilikom glasanja o samoj tački.

Predsjedavajuća je konstatirala da 51. sjednica Predstavničkog doma ima sljedeći

DNEVNI RED

1. Usvajanje Zapisnika 50. sjednice Predstavničkog doma Parlamentarne skupštine BiH;
2. Komentari na dobivene odgovore na poslanička pitanja;
3. Izjašnjavanje Predstavničkog doma o utvrđivanju novog roka za dostavljanje Izvještaja o Prijedlogu zakona o parlamentarnom nadzoru, predlagač: Privremena zajednička komisija

- oba doma Parlamentarne skupštine BiH za pripremu i upućivanje u parlamentarnu proceduru Prijedloga zakona o parlamentarnom nadzoru, broj: 01,02-02-1-1348/17, od 26.5.2017. (drugo čitanje);
4. Prijedlog zakona o izmjeni Zakona o državnoj službi u institucijama Bosne i Hercegovine, predlagač: poslanica Maja Gasal-Vražalica, zakon broj: 01-02-1-1377/17, od 31.5.2017. (drugo čitanje);
 5. Godišnji izvještaj iz oblasti poljoprivrede za Bosnu i Hercegovinu za 2016. godinu, podnosilac: Ministarstvo vanjske trgovine i ekonomskih odnosa BiH, broj: 01,02-28-1791/17, od 20.7.2017.;
 6. Izvještaj Ministarstva sigurnosti BiH o trendovima migracija i aktivnostima na zaštiti ljudskih prava i osnovnih sloboda migranata i tražilaca azila, s Mišljenjem Zajedničke komisije za ljudska prava, broj:03/6-37-1226/17, od 12.5.2017.;
 7. Izvještaj o aktivnostima u vezi sa izgradnjom Pelješkog mosta i Izvještaj o aktivnostima na realizaciji projekta izgradnje međudržavnog mosta preko rijeke Save kod Svilaja i priključnih graničnih dionica autoputa na Koridoru 5c, podnosilac: Ministarstvo komunikacija i prometa BiH (realizacija poslaničke inicijative usvojene na 49. sjednici Predstavničkog doma, održanoj 5.7.2017.), akt broj: 01-50-1-1474/17, od 28.8.2017.;
 8. Razmatranje poslaničke inicijative Nikole Lovrinovića koja glasi: „*Na osnovu člana 8. Poslovnika Predstavničkog doma Parlamentarne skupštine BiH („Službeni glasnik BiH“, br. 79/14, 81/15 i 97/15), podnosim poslaničku inicijativu za uvrštavanje u dnevni red naredne sjednice Predstavničkog doma i Doma naroda Parlamentarne skupštine BiH tačku pod nazivom: „Izjašnjavanje domova Parlamentarne skupštine BiH o članu 7. st. (3) i (4) Poslovnika Parlamentarnog odbora za stabilizaciju i pridruživanje između Parlamentarne skupštine BiH i Evropskog parlamenta“*“, broj: 01-50-1-1508/17, od 16.6.2017.;
 9. Razmatranje poslaničke inicijative Denisa Bećirovića koja glasi: „*Na osnovu člana 8. Poslovnika Predstavničkog doma Parlamentarne skupštine BiH („Službeni glasnik BiH“, br. 79/14, 81/15 i 97/15), podnosim poslaničku inicijativu kojom se zadužuje Vijeće ministara BiH da u saradnji s entitetskim vladama, najkasnije u roku od šest mjeseci od dana usvajanja ove inicijative u Predstavničkom domu Parlamentarne skupštine BiH, sačini i u parlamentarnu proceduru dostavi prijedlog mjera efektivne zaštite domaće poljoprivredne proizvodnje u Bosni i Hercegovini“*“, broj:01-50-1-1622/17, od 5.7.2017.;
 10. Razmatranje poslaničke inicijative Senada Šepića koja glasi: „*U skladu s članom 8. Poslovnika Predstavničkog doma Parlamentarne skupštine BiH, predlažem da se u dnevni red prve naredne sjednice Predstavničkog doma Parlamentarne skupštine BiH obavezno uvrsti tačka pod nazivom: Informacija o realizaciji ranijih zaključaka i inicijativa o utvrđivanju najniže, zagarantirane cijene i sigurnog otkupa poljoprivrednih proizvoda u BiH, te prijedlog mjera za odgovor na ovu inicijativu“*“, broj:01-50-1-1623/17, od 5.7.2017.;
 11. Informacija predsjedavajućeg Vijeća ministara BiH Denisa Zvizdića o aktuelnom stanju i odnosu Vijeća ministara BiH prema Parlamentarnoj skupštini BiH, te odnosu prema parlamentarnoj većini, predlagač: poslanik Sadik Ahmetović, broj: 01-50-1-15-51/17, od 7.9.2017.;

12. Informacija o aktivnostima Agencije za nadzor nad tržištem BiH, materijal Zajedničke komisije za ekonomske reforme i razvoj, broj: 03/3-50-14-9-12-3/17, od 12.6.2017.;
13. Prijedlog zaključka o osnivanju Privremene zajedničke komisije oba doma Parlamentarne skupštine Bosne i Hercegovine za provođenje procedure imenovanja Nezavisnog odbora i Odbora za žalbe građana kao nezavisnih tijela policijske strukture Bosne i Hercegovine, predlagač: Zajednički kolegij oba doma Parlamentarne skupštine BiH, broj: 01,02-34-1-1893/17, od 31.7.2017.;
14. Prijedlog zaključka o formiranju Interresorne radne grupe za izradu Zakona o ispitivanju porijekla imovine zvaničnika u institucijama Bosne i Hercegovine, predlagač: Zajednički kolegij oba doma Parlamentarne skupštine BiH, broj: 01,02-34-1-1894/17, od 31.7.2017.;
15. Davanje saglasnosti za ratifikaciju Sporazuma o zajmu (Projekat podrške zapošljavanju) između Bosne i Hercegovine i Međunarodne banke za obnovu i razvoj, materijal broj: 01,02-05-2-1546/17, od 22.6.2017.;
16. Davanje saglasnosti za ratifikaciju Sporazuma između Vijeća ministara Bosne i Hercegovine i Vlade Republike Makedonije u procesu pristupanja Evropskoj uniji, broj: 01,02-05-2-1902/17, od 31.7.2017.

Ad.1. Usvajanje Zapisnika 50. sjednice Predstavničkog doma Parlamentarne skupštine BiH

Nakon uvodnih napomena, predsjedavajuća je otvorila raspravu. Damir Arnaut iznio je primjedbu.

Zapisnik 50. sjednice, s primjedbom Damira Arnauta, usvojen je s 38 glasova „za“ (iz Federacije BiH 25, iz Republike Srpske 16), bez glasova „protiv“ i jednim glasom „suzdržan“.

Ad.2. Komentari na dobivene odgovore na poslanička pitanja

Predsjedavajuća je podsjetila da su, u skladu s članom 170. Poslovnika, do ove sjednice Doma pitanja u pisanoj formi postavili poslanici:

- **Damir Arnaut** – predsjedavajućem Vijeća ministara BiH, ministru finansija i trezora BiH, ministru komunikacija i prometa BiH, ministrici za ljudska prava i izbjeglice BiH, ministru sigurnosti BiH, ministru civilnih poslova BiH, članovima Centralne izborne komisije BiH, sekretaru Zajedničke komisije za ljudska prava PSBiH i sekretaru Zajedničke službe Sekretarijata PSBiH;
- **Mirsad Đonlagić** – predsjedavajućem Vijeća ministara BiH;
- **Saša Magazinović** –predsjedavajućem Komisije za očuvanje nacionalnih spomenika BiH, predsjedavajućem Komisije za koncesije BiH, predsjedavajućem Vijeća ministara BiH, ministru komunikacija i prometa BiH i direktoru Granične policije BiH;
- **Damir Bećirović** – ministru komunikacija i prometa BiH;
- **Nikola Lovrinović** – uputio inicijativu Kolegiju Doma;

- **Maja Gasal - Vražalica** – uputila pitanja Vladi Srednjobosanskog kantona, odnosno pojedinim ministarstvima Vlade SBK, te Vladi Federacije BiH, odnosno pojedinim ministarstvima Vlade FBiH.

Sadržaj postavljenih pitanja je sljedeći:

Damir Arnaut

Pitanja postavljena predsjedavajućem Vijeća ministara BiH i ministru finansija i trezora BiH: „U vezi s pismom koje sam zaprimio od „zaposlenih u institucijama kojima je još stalo do Bosne i Hercegovine (u vezi sa usklađivanjem Izmjena i dopuna Zakona o plaćama i naknadama u institucijama BiH, vezano za naknade članova upravnih i nadzornih odbora)“ (kopija u prilogu), tražim da mi dostavite:

1. sve zaključke sa svih sjednica na kojima se raspravljalo o pitanjima koja se tiču navoda iz tog pisma,
2. stenograme sa svih sjednica na kojima se raspravljalo o pitanjima koja se tiču navoda iz tog pisma,
3. sve dodatne informacije o pitanjima koja se tiču navoda iz tog pisma.

Pitanja postavljena članovima Centralne izborne komisije BiH:

1. „Da li savjetnici imenovanih zvaničnika (ministara, članova Predsjedništva BiH, članova kolegija oba doma Parlamentarne skupštine BiH) u institucijama BiH mogu istovremeno biti članovi općinskih izbornih komisija?
2. Ako trenutno ne postoje ograničenja, da li CIK BiH planira predložiti izmjene i dopune Izbornog zakona BiH kojim bi se ona uvela?“

Pitanje postavljeno sekretarki Zajedničke komisije za ljudska prava PSBiH i sekretaru Zajedničke službe PSBiH:

„U listu „Dnevni avaz“ od 29.7.2017. pod naslovom „Zahvaljujući SDA, bivši Karadžićev vojnik kontrolira OSA-u: Borislav Bojić bio oficir u čijoj je zoni odgovornosti otkrivena Tomašica!“, objavljen je razgovor s preživjelim logorašem, u kojem se, između ostalog, navodi:

„Duratović je otkrio da je s Bojićevom ratnom prošlošću upoznao i bošnjačke stranke u Parlamentu BiH kada je ovaj poslanik SDS-a trebao biti imenovan 2015. godine na čelo Zajedničke komisije za ljudska prava BiH.“

„Ističe da je od poslanika koje je tada kontaktirao njegova upozorenja čuo samo Damir Arnaut, poslanik SBB-a, koji je tada iz protesta odbio prisustvovati sjednici Komisije na kojoj je Bojić izabran.“

„Ipak su ga izabrali, a meni su rekli da su morali, jer da nisu, tvrde, onda bi SDS njima oborio imenovanja u svim drugim komisijama. Mi, povratnici davno smo se uvjerali da je bošnjački politički vrh predvođen SDA spreman na truhle kompromise i najmanje jednom mjesečno nas ošamare takvim imenovanjima koja idu na štetu povratnika.“

Kako mogu potvrditi da gosp. Duratović tada sa mnom jeste obavio navedeni razgovor, da jesam odbio prisustvovati konstituirajućoj sjednici ove komisije iz razloga navedenih u tekstu, ali da je u Zapisniku konstituirajuće sjednice te komisije navedeno da je: „Delegat Halid Genjac rekao da je na sjednici Zajedničkog kolegija oba doma Parlamentarne skupštine BiH dogovoreno da Borislav Bojić bude imenovan za predsjedavajućeg, Halid Genjac za prvog zamjenika predsjedavajućeg...“ molim da me obavijestite o sljedećem:

Pitanje postavljeno sekretarki Zajedničke komisije za ljudska prava PSBiH: Da li je delegat i član Komisije gosp. Genjac tada raspolagao tim informacijama, ako jeste, da li je djelovao na osnovu njih, te ako nije, da li planira preduzeti naknadne radnje?

Pitanje postavljeno sekretaru Zajedničke službe PSBiH: Da li je tadašnji predsjedavajući Predstavničkog doma PSBiH i član Kolegija tog doma Džaferović raspolagao tim informacijama, ako jeste, da li je djelovao na osnovu njih, te ako nije, da li planira preduzeti naknadne radnje?

Pitanja postavljena predsjedavajućem Vijeća ministara BiH i ministru finansija i trezora BiH:

U vezi s Komisijom za odabir projekata utroška grant sredstava za izgradnju partnerstva između nevladinih organizacija i nadležnih institucija za provođenje Konvencije o prevenciji i borbi protiv nasilja nad ženama i nasilja u porodici, osnovane odlukom Vijeća ministara BiH od 7.7.2016. („Službeni glasnik BiH“, broj 67/16), molim da mi dostavite:

1. listu članova komisije,
2. sve informacije o sjednicama navedene komisije (broj održanih sjednica od konstituiranja do danas, datume održavanja sjednica, zapisnike i sve druge akte sa sjednica...),
3. informacije o naknadama, prikazane tabelarno po članu Komisije,
4. konačan izvještaj o radu, propisan članom 11 (6) Odluke.

Pitanja postavljena ministrici za ljudska prava i izbjeglice BiH:

1. ko su osobe angažirane kao savjetnici/savjetnice, te šef kabineta ministrice?
2. konkretna zaduženja svakog savjetnika,
3. ranije radno iskustvo svakog savjetnika,
4. članstvo u komisijama, odborima i drugim radnim tijelima, bilo na nivou institucija BiH ili na bilo kojem nižem nivou vlasti, za svakog savjetnika pojedinačno.

Pitanja postavljena predsjedavajućem Vijeća ministara BiH i ministru finansija i trezora BiH

U vezi sa Izvještajem o radu Interresorne radne grupe za analizu stanja i predlaganje modaliteta uvođenja novih tehnologija u izborni proces u Bosni i Hercegovini (akt Vijeća ministara BiH, br. 05-07-3-1761/17, od 26.7.2017.), molim odgovore na sljedeća pitanja:

1. Zašto je predstavnik Ministarstva finansija i trezora BiH Mario Živković prisustvovao samo na pet od ukupno 12 održanih sjednica Interresorne radne grupe?
2. Da li je Živkoviću isplaćena bilo kakva naknada za rad u Interresornoj radnoj grupi?
3. Ako jeste, za koje mjesece, u kojem iznosu, te na osnovu koje odluke ili drugog akta?“

Pitanja postavljena predsjedavajućem Vijeća ministara BiH i ministru komunikacija i prometa BiH:

U vezi sa Izvještajem o radu Interresorne radne grupe za analizu stanja i predlaganje modaliteta uvođenja novih tehnologija u izborni proces u Bosni i Hercegovini (akt Vijeća ministara BiH, br. 05-07-3-1761/17, od 26.7.2017.), molim odgovore na sljedeća pitanja:

1. Zašto je predstavnik Ministarstva komunikacija i prometa BiH Zoran Andrić prisustvovao samo na šest od ukupno 12 održanih sjednica Interresorne radne grupe?
2. Da li je Andriću isplaćena bilo kakva naknada za rad u Interresornoj radnoj grupi?
3. Ako jeste, za koje mjesece, u kojem iznosu, te na osnovu koje odluke ili drugog akta?“

Pitanja postavljena predsjedavajućem Vijeća ministara BiH i ministru sigurnosti BiH: U vezi sa Izvještajem o radu Interresorne radne grupe za analizu stanja i predlaganje modaliteta uvođenja novih tehnologija u izborni proces u Bosni i Hercegovini (akt Vijeća ministara BiH, br. 05-07-3-1761/17, od 26.7.2017.), molim odgovore na iduća pitanja:

1. Zašto je predstavnik Ministarstva sigurnosti BiH Igor Golijanin prisustvovao samo na pet od ukupno 12 održanih sjednica Interresorne radne grupe?
2. Da li je Golijaninu isplaćena bilo kakva naknada za rad u Interresornoj radnoj grupi?
3. Ako jeste, za koje mjesece, u kojem iznosu, te na osnovu koje odluke ili drugog akta?“

Pitanja postavljena predsjedavajućem Vijeća ministara BiH i ministru civilnih poslova BiH:

Vijeće ministara BiH je, na prijedlog ministra Osmanovića, prošle godine dostavilo odgovor na moje poslaničko pitanje. Iz tog odgovora proizilazi potpuno nepoznavanje problematike koja se tiče međunarodnog prava mora. Primjera radi, na moje pitanje kada će Bosna i Hercegovina samostalno utvrditi normalne polazne crte, što je obaveza svake obalne države prema članu 5. UNCLOS-a, kao i kada će naša zemlja povući ravne polazne crte u skladu sa članom 7. UNCLOS-a, Vijeće ministara BiH je odgovorilo: „S obzirom na to da Ugovor o državnoj granici između Bosne i Hercegovine i Republike Hrvatske nije ratificiran, a jasno definirana i usaglašena granična crta predstavlja osnov za aktivnosti opisane u Konvenciji o pravu mora (UNCLOS), Ministarstvo civilnih poslova BiH ne raspolaže saznanjima da su vođene aktivnosti sadržane u poslaničkim pitanjima...“ (u prilogu)

Uzimajući u obzir:

- da je ovaj odgovor potpuno pogrešan, jer utvrđivanje normalnih polaznih crta upravo nužno prethodi razgraničenju na moru (s obzirom na to da se širina teritorijalnog mora mjeri počev od normalnih polaznih crta, odnosno od ravnih polaznih crta ako ih data država odluči povući),
- da je razgraničenje između BiH i Hrvatske prema ugovoru iz 1999. izvršeno na osnovu normalnih polaznih crta BiH koje je dostavio i Hidrografski institut iz Splita, ali da BiH nikada nije samostalno odredila svoje normalne polazne crte, niti objavila njihove mape, kako to nalaže član 5. UNCLOS-a,
- da su sve obalne države bivše Jugoslavije svoje normalne (ali i ravne) polazne crte samostalno utvrdile i objavile njihove mape znatno prije razgraničenja sa svojim susjedima, te
- da je Bosna i Hercegovina jedina obalna država u svijetu koja nikada nije samostalno odredila svoje normalne polazne crte, te jedna od rijetkih koja nije povukla ravne polazne crte.

Molim da mi odgovorite:

1. Kako je moguće da Vijeće ministara BiH dostavi tako pogrešne odgovore o materiji koja se tiče strateških interesa Bosne i Hercegovine kao obalne države?
2. Ko je odgovoran za te greške? Navesti konkretne zvaničnike i službenike.
3. Ko je učestvovao u pripremi navedenih odgovora? Navesti konkretne zvaničnike i službenike.
4. Ko je odobrio slanje tih odgovora prema Vijeću ministara BiH na usvajanje?
5. Da li u institucijama BiH postoje službenici čija je uža specijalnost međunarodno pravo mora?
6. Ako postoje, ko su konkretno ti službenici i koje su njihove kvalifikacije?
7. Kada će BiH samostalno utvrditi normalne polazne crte i eventualno proglasiti ravne polazne crte duž svoje obale, odnosno povući crtu kojom se zatvara Neumski zaljev, te objasniti njihove mape?

Mirsad Đonlagić

Pitanja postavljena predsjedavajućem Vijeća ministara BiH:

Pitanja u vezi s komentarima na RTS-u povodom statusa Republike Srpske i njihove želje da se "RS vrati u sastav Srbije", te pisanjima predsjednika Srbije Aleksandra Vučića u vezi s Kosovom i Republikom Srpskom:

1. Da li znate za ove priče i ako znate, namjeravate li preduzimati nešto zvanično?
2. Ako pak ne znate, namjeravate li to provjeriti, tražiti reakciju Vlade Srbije te ponuditi narodu u Bosni i Hercegovini odgovor koji neće dovesti do nekih paničnih reakcija, odnosno koji će umiriti narod u BiH, ali i narod u Srbiji?

Saša Magazinović

Pitanje postavljeno predsjedavajućem Komisije za očuvanje nacionalnih spomenika:

1. „Kolike plaće i eventualno druge naknade imaju danas članovi Komisije za očuvanje nacionalnih spomenika BiH i koliki su ti iznosi bili u 2015. i 2016. godini?
2. Kolike su plaće bile ostalim zaposlenima 2015. i 2016. godine, a kolike su danas?
3. Šta je osnova za eventualne promjene iznosa plaća članovima Komisije za očuvanje nacionalnih spomenika BiH?
4. Da li je došlo do promjene statusa članova Komisije za očuvanje nacionalnih spomenika BiH? Ako jeste, ko je i kada donio odluku?“

Pitanje postavljeno predsjedavajućem Komisije za koncesije BiH:

1. „Ima li naznaka da bi Komisija za koncesije BiH mogla izdati svoju prvu koncesiju?
2. Kako izgleda radni dan člana Komisije za koncesije?“

Pitanja postavljena predsjedavajućem Vijeća ministara BiH:

1. „Da li se Vijeće ministara BiH bavilo analizom učinka Komisije za koncesije BiH i kakvi su zaključci?
2. Kada će biti imenovani novi članovi Komisije budući da je starima prije nekoliko godina istekao mandat?
3. Da li je razmatrano smanjenje plaća i promjena statusa članova Komisije s obzirom na rezultate rada?
4. Budući da su svi članovi Komisije muškarci, da li je ženama zabranjeno članstvo u Komisiji?“

Pitanja postavljena direktoru Granične policije BiH:

1. „Da li postoji analiza i kakvi su njeni nalazi u vezi sa stanjem i uslovima za obavljanje radnih zadataka Granične policije BiH?
2. Šta je u posljednjih godinu dana konkretno urađeno na unapređenju uređenja graničnih prijelaza i poboljšanja uslova rada Granične policije BiH?“

Pitanja postavljena predsjedavajućem Vijeća ministara BiH:

1. „Da li Vijeće ministara BiH ima informaciju i ako ima, šta je učinjeno po pitanju zaštite interesa Bosne i Hercegovine, a povodom usvajanja u Narodnoj skupštini Republike Srbije Zakona o potvrđivanju Sporazuma između Vlade Republike Srbije i Vlade Republike Italije o saradnji u oblasti energetike („Službeni glasnik RS – Međunarodni ugovori“, broj 7/2012) kojim se tretira teritorija, projekti i prirodna bogatstva i u Bosni i Hercegovini?

2. Da li su institucije Republike Srpske, s obzirom na to da su potpisivale međunarodne izjave/sporazume, tražile i dobile za to saglasnost odgovarajućih institucija BiH, u skladu sa Ustavom BiH? Ako nisu, da li tu ima krivične odgovornosti?
3. Da li ste o ovoj temi do sada razgovarali u susretima sa čelnim ljudima Srbije i ako niste, da li namjeravate o tome razgovarati s predsjednikom Vučićem tokom njegove naredne posjete? Šta ćete inače preduzeti da se zaštite interesi BiH i koje mjere ćete tražiti od Republike Srbije da se preduzmu po ovom pitanju?“

Damir Bećirović

Pitanje postavljeno ministru komunikacija i prometa BiH:

1. „Koliko sastanaka s tematikom izgradnje Pelješkog mosta su održali predstavnici Ministarstva komunikacija i prometa BiH s predstavnicima Vlade Republike Hrvatske nakon smjene ministra Slavka Matanovića?
2. Ko su, imenom i prezimenom te funkcijom, osobe iz Ministarstva komunikacija i prometa BiH koje su učestvovala na sastancima vezanim za izgradnju Pelješkog mosta a koji su održavani s predstavnicima Vlade Republike Hrvatske u periodu od 1.12.2016. do 1.8.2017.?
3. Molim vas da mi dostavite zapismike s predmetnih sastanaka.
4. Dostavite mi odgovor na akt Ministarstva broj 01-14-2-2285/15, od 20.7.2015., a tiče se zahtjeva ministra Slavka Matanovića upućenog u Ministarstvo mora, prometa i infrastrukture Republike Hrvatske, ako postoji.

Maja Gasal-Vražalica

Pitanje postavljeno Vladi Federacije BiH, odnosno Ministarstvu turizma i okoliša FBiH i Ministarstvu poljoprivrede, vodoprivrede i šumarstva FBiH:

1. „Koji je stav Ministarstva na čijem ste čelu u kontekstu gradnje minihidrolektrane Kruščica, uzimajući u obzir sve zakone koji su na snazi u FBiH a koji se odnose na zaštitu okoliša/prirode, vodnih resursa, osobito pitke vode, ali i međunarodne konvencije koje je Bosna i Hercegovina potpisala.“

Pitanja postavljena Vladi Srednjobosanskog kantona, odnosno Ministarstvu unutrašnjih poslova SBK, Ministarstvu poljoprivrede, vodoprivrede i šumarstva SBK i Ministarstvu zdravstva i socijalne politike SBK:

Pitanje postavljeno Ministarstvu unutrašnjih poslova SBK

1. „Da li su pripadnici specijalne policije SBK u slučaju „Kruščica“ postupili u skladu sa Zakonom o policijskim službenicima SBK? Da li su se identificirali (član 7. Zakona)? Zašto su dostupni video zapisi puni nehumanog i neprofesionalnog odnosa prema okupljenim ženama, te ko je naložio/odlučio upotrijebiti silu (član 11.)? Na dostupnim video zapisima vidi se da među okupljenim ženama ima starijih i nemoćnih lica, čak je bila prisutna i jedna trudnica, zašto ste upotrijebili silu (član 28.)? Da li postoji izvještaj o upotrebi sile policijskih službenika (član 32.)? Koga su taj dan štitili policijski službenici i od čega, koji je opći interes branjen, te kojoj javnosti su pomagali (član 36.)?“

Pitanje postavljeno Ministarstvu poljoprivrede, vodoprivrede i šumarstva SBK

1. „Da li je Ministarstvo ikada obavilo javnu raspravu na koju su bili pozvani i mještani Kruščice i uzimajući u obzir sve važeće zakone u FBiH u dijelu koji se odnosi na zaštitu prirode, vodnih resursa, okoliša kao i sve međunarodne konvencije, koje je BiH potpisala, koji je stav Ministarstva o gradnji minihidroelektrane u Kruščici?“

Pitanja postavljena Ministarstvu zdravstva i socijalne politike SBK?

1. „Koje posljedice po zdravlje mještana može proizvesti gradnja minihidroelektrane Kruščica?
2. Koji je stav Ministarstva o ovom pitanju?“

U skladu s članom 170. Poslovnika, na ovoj sjednici Doma inicijative i pitanja Vijeću ministara BiH i Vladi Federacije BiH uputio je poslanik Senad Šepić, a Denis Bećirović uputio je inicijativu Kolegiju Doma.

Sadržaj inicijativa i pitanja je sljedeći:

Senad Šepić

Pitanja postavljena Vijeću ministara BiH:

1. „Molim da mi dostavite informaciju o broju upisanih učenika u školskim godinama 2014./2015., 2015./2016., 2016./2017. i 2017./2018. Molim uporedne pokazatelje po kantonima, entitetima i općinama u BiH.“
1. „Koliko je sredstava BiH iskoristila iz dostupnih fondova EU u 2015. i 2016. godini? Također, koliko su u istom periodu iskoristile zemlje regiona: Srbija, Crna Gora, Makedonija?“
1. „Molim da mi dostavite informaciju o broju zdravstvenih usluga i intervencija prema pacijentima u BiH, po općinama i prema zdravstvenim ustanovama u 2014., 2015., 2016. i 2017. godini.“

Inicijativa upućena Vijeću ministara BiH:

„Predlažem da Vijeće ministara BiH izradi i u parlamentarnu proceduru uputi Nacrt zakona o fiskalnoj odgovornosti u BiH, a u roku ne dužem od 60 dana.“

Pitanja postavljena Vladi Federacije BiH:

1. „Molim da mi dostavite informaciju o dobiti JP BH Telekom u periodu 2010. – 2017. godina (ukupan iznos po godinama) kao i odluke o utrošku tih sredstava- investirana sredstva prema općinama / kantonima.“
1. „Molim da mi dostavite informaciju o iznosu investiranih sredstava iz GSM licence za period 2010. – 2017. godina (pregled po godinama) kao i odluke o utrošku ovih sredstava po općinama i kantonima.“

Denis Bećirović

Inicijativa upućena Kolegiju Predstavničkog doma:

„Zadužuje se Vijeće ministara BiH da, u roku od 30 dana od dana usvajanja ove inicijative, pripremi i u parlamentarnu proceduru dostavi Izvještaj o napretku Bosne i Hercegovine u procesu priključenja NATO-u s prijedlogom konkretnih mjera za dinamiziranje aktivnosti Bosne i Hercegovine na putu ka punopravnom članstvu u NATO-u.“

Predsjedavajuća je rekla da su do današnje sjednice dostavljeni sljedeći odgovori na poslanička pitanja:

- na pitanje poslanice **Maje Gasal-Vražalice**, postavljeno u usmenoj formi na 49. sjednici, Vijeće ministara BiH prosljedilo je odgovor Ministarstva civilnih poslova BiH, te na pitanje postavljeno u pisanoj formi na 48. sjednici odgovor je dostavilo Vijeće ministara BiH. Agencija za statistiku BiH dostavila je odgovor na pitanje postavljeno u pisanoj formi na 41. sjednici;
- na pitanja poslanika **Damira Arnauta**, postavljena na 36. sjednici i na 49. sjednici, odgovore je dostavilo Vijeće ministara BiH. Na pitanja postavljena u pisanoj formi na 50. sjednici, odgovore su dostavili Ministarstvo pravde BiH i Vijeće ministara BiH;
- na pitanje poslanika **Senada Šepića**, postavljeno u pisanoj formi na 48. sjednici i na dvije inicijative podnesene na istoj sjednici, odgovore je dostavilo Vijeće ministara BiH;
- na pitanje poslanika **Nikole Lovrinovića**, postavljeno u pisanoj formi na 45. sjednici, odgovor je dostavilo Vijeće ministara BiH;
- na pitanja poslanika **Mirsada Mešića**, postavljena u pisanoj formi na 49. i 50. sjednici, odgovore je dostavilo Vijeće ministara BiH;
- odgovor na inicijativu poslanika **Mensure Beganović i Safera Demirovića** od 31. 5. 2017. dostavilo je Vijeće ministara BiH;
- na pitanja poslanika **Saše Magazinovića**, postavljena u pisanoj formi na 46. i 49. sjednici, odgovore je dostavilo Vijeće ministara BiH, te na pitanja postavljena u pripremi 51. sjednice odgovore su dostavili Granična policija BiH, Komisija za koncesije BiH i Komisija za očuvanje nacionalnih spomenika BiH;
- na pitanje poslanika **Mirsada Donlagića**, postavljeno u pisanoj formi na 40. sjednici, odgovor je dostavilo Ministarstvo vanjskih poslova BiH;
- na pitanje poslanika **Predraga Kožula**, postavljeno u pisanoj formi na 41. sjednici, odgovor je dostavilo Vijeće ministara BiH;
- na pitanje poslanice **Aleksandre Pandurević**, postavljeno u usmenoj formi na 49. sjednici, odgovor je dostavilo Vijeće ministara BiH;
- na pitanje poslanika **Amira Fazlića**, postavljeno u usmenoj formi na 49. sjednici, odgovor je dostavilo Vijeće ministara BiH;
- na pitanje poslanika **Šemsudina Mehmedovića**, postavljeno u pisanoj formi na 50. sjednici, odgovor je dostavilo Vijeće ministara BiH.

Dostavljene odgovore komentirali su poslanici:

Mirsad Mešić rekao je, s obzirom na to da ministrica za ljudska prava i izbjeglice BiH Semiha Borovac nije prisutna, da odgovor želi komentirati na narednoj sjednici.

Damir Bećirović izrazio je nezadovoljstvo nedobivanjem odgovora na usmeno pitanje postavljeno na 48. sjednici Doma, održanoj 14.6.2017., od Ministarstva pravde BiH u vezi s napadom na Tuzlanski konvoj spasa i ubistva sedam vozača konvoja. Također je istakao da nije dobio odgovor ni od Ministarstva komunikacija i prometa BiH u vezi s pitanjem Pelješkog mosta, te komentirao izjave sadašnjeg ministra komunikacija i prometa BiH o istoj temi.

Zaim Backović istakao je nezadovoljstvo odgovorom Ministarstva komunikacija i prometa BiH u vezi s prikupljenim sredstvima od akciza na gorivo, putarina, registracija vozila i ostalih sredstava iz drugih izvora.

Mensura Beganović komentirala je odgovor Vijeća ministara BiH na inicijativu.

Maja Gasal-Vražalica zatražila je da se Ministarstvu civilnih poslova BiH uputi urgencija za dostavu odgovora na pitanje postavljeno u usmenoj formi o aferi „Hrvatska žena“ Livno, te da se Ministarstvu dostavi i izvod iz stenograma 49. sjednice Doma, na kojoj je pitanje i postavljeno.

Predrag Kožul komentirao je odgovor Ministarstva vanjske trgovine i ekonomskih odnosa BiH, te izrazio nezadovoljstvo zbog njegovog značajnog kašnjenja. Također, nezadovoljan je nedobivanjem odgovora od Tužilaštva BiH na pitanja u vezi s procesuiranjem ratnih zločina počinjenih u logorima i zatvorima.

Damir Arnaut izrazio je nezadovoljstvo dostavljenim odgovorima, te najavio postavljanje dopunskih poslaničkih pitanja na njih. Izrazio je zabrinutost odgovorom Ministarstva pravde BiH na pitanje o podnošenju prijedloga izmjena i dopuna relevantnih zakonskih rješenja kako bi se osiguralo da svi osuđeni na zatvorske kazne na osnovu člana 162b. Krivičnog zakona BiH budu upućeni na izdržavanje kazni odmah po pravosnažnosti presude.

Ad.3. Izjašnjavanje Predstavničkog doma o utvrđivanju novog roka za dostavljanje Izvještaja o Prijedlogu zakona o parlamentarnom nadzoru, predlagač: Privremena zajednička komisija oba doma Parlamentarne skupštine BiH za pripremu i upućivanje u parlamentarnu proceduru Prijedloga zakona o parlamentarnom nadzoru, broj: 01,02-02-1-1348/17, od 26.5.2017. (drugo čitanje)

Predsjedavajuća Borjana Krišto dala je uvodne napomene i otvorila raspravu. U raspravi su učestvovali: Damir Arnaut, Nikola Lovrinović, Dušanka Majkić, Momčilo Novaković i Borislav Bojić.

Tokom rasprave Damir Arnaut zatražio je da se u zapisnik unese sljedeće:

“Damir Arnaut: Čuli ste, iako nije govorio u mikrofon, čuli ste gospodina Bojića i njegov komentar, Poslovnik zabranjuje vrijeđanje poslanika i ja tražim da ova moja poslovnička intervencija uđe u zapisnik ove sjednice.“⁵

Domu se obratio predsjedavajući Vijeća ministara BiH Denis Zvizdić

Dom je, s 25 glasova „za“ (iz Federacije BiH 18, iz Republike Srpske sedam), 11 glasova „protiv“ i tri glasa „suzdržan“, **produžio rok za 30 dana** za dostavljanje izvještaja o Prijedlogu zakona o parlamentarnom nadzoru.

Ad.4. Prijedlog zakona o izmjeni Zakona o državnoj službi u institucijama Bosne i Hercegovine, predlažać: poslanica Maja Gasal-Vražalica, zakon broj: 01-02-1-1377/17, od 31.5.2017. (drugo čitanje)

Predsjedavajuća je dala uvodne napomene i otvorila raspravu. Nije bilo rasprave.

Dom je, s 29 glasova „za“ (iz Federacije BiH 22, iz Republike Srpske sedam), deset glasova „protiv“ i bez glasa „suzdržan“, **usvojio u drugom čitanju** Prijedlog zakona o izmjeni Zakona o državnoj službi u institucijama Bosne i Hercegovine.

Ad.5. Godišnji izvještaj iz oblasti poljoprivrede za Bosnu i Hercegovinu za 2016. godinu, podnosilac: Ministarstvo vanjske trgovine i ekonomskih odnosa BiH, broj: 01,02-28-1791/17, od 20.7.2017.

Predsjedavajuća je dala uvodne napomene i otvorila raspravu. U raspravi su učestvovali: Jasmin Emrić, Predrag Kožul, Mensura Beganović, Fehim Škaljić, Salko Sokolović, Zaim Backović i Nermina Kapetanović.

Dom je, s 17 glasova „za“ (iz Federacije BiH 11, iz Republike Srpske šest), devet glasova „protiv“ i 13 glasova „suzdržan“, **usvojio** Godišnji izvještaj iz oblasti poljoprivrede za Bosnu i Hercegovinu za 2016. godinu.

Na prijedlog poslanika iz Kluba Nezavisni blok, Dom je, s 23 glasa „za“ (iz Federacije BiH 16, iz Republike Srpske sedam), šest glasova „protiv“ i deset glasova „suzdržan“, **usvojio** zaključak koji glasi: **„Predstavnički dom Parlamentarne skupštine BiH zadužuje Ministarstvo vanjske trgovine i ekonomskih odnosa BiH da pokrene inicijativu za uvođenje „plavog dizela“ pokretanjem postupka za donošenje Zakona o izmjenama i dopunama Zakona o akcizama u BiH.“**

⁵ Izvod iz neautoriziranog transkripta 51. sjednice Predstavničkog doma PSBiH

Ad.6. Izvještaj Ministarstva sigurnosti BiH o trendovima migracija i aktivnostima na zaštiti ljudskih prava i osnovnih sloboda migranata i tražilaca azila, s Mišljenjem Zajedničke komisije za ljudska prava, broj:03/6-37-1226/17, od 12.5.2017.

Predsjedavajuća je dala uvodne napomene i otvorila raspravu. Diskutirao je Damir Arnaut. Predložio je da se rasprava i izjašnjavanja o ovoj tački odgode za narednu sjednicu, jer nije prisutan ovlašteni predstavnik iz Ministarstva sigurnosti BiH (ministar ili zamjenik ministra).

Zatim je Dom glasao o tome da li će se voditi rasprava o ovoj tački bez prisustva predlagača. Ovaj prijedlog nije prihvaćen. S 14 glasova „za“ (iz Federacije BiH osam, iz Republike Srpske šest), 18 glasova „protiv“ i šest glasova „suzdržan“, **odgođena je rasprava** o Izvještaju Ministarstva sigurnosti BiH o trendovima migracija i aktivnostima na zaštiti ljudskih prava i osnovnih sloboda migranata i tražilaca azila.

Ad.7. Izvještaj o aktivnostima u vezi sa izgradnjom Pelješkog mosta i Izvještaj o aktivnostima na realizaciji projekta izgradnje međudržavnog mosta preko rijeke Save kod Svilaja i priključnih graničnih dionica autoputa na Koridoru 5c, podnosilac: Ministarstvo komunikacija i prometa BiH (realizacija poslaničke inicijative usvojene na 49. sjednici Predstavničkog doma, održanoj 5.7.2017.), akt broj: 01-50-1-1474/17, od 28.8.2017.

Predsjedavajuća je dao uvodne napomene i otvorio raspravu. U raspravi su učestvovali: Hanka Vajzović, Damir Bećirović, Amir Fazlić, Predrag Kožul, Denis Bećirović, Maja Gasal – Vražalica, Nikola Lovrinović, Šemsudin Mehmedović, Nermina Kapetanović, Sadik Ahmetović, Diana Zelenika, Zaim Backović, Aleksandra Pandurević, Momčilo Novaković, Mladen Bosić, Šefik Džaferović, Mirsad Đonlagić, Salko Sokolović, Fehim Škaljić, Damir Arnaut, Jasmin Emrić, Borjana Krišto, Senad Šepić i Mirsad Isaković.

Domu su se obratili ministar komunikacija i prometa BiH Ismir Jusko i ministar finansija i trezora BiH Vjekoslav Bevanda.

Tokom rasprave Damir Arnaut zatražio je da se u Zapisnik unese sljedeće:

“Damir Arnaut: “Kao neko ko je previše puta bio žrtva gospodina Džaferovića kada bih 10 sekundi prešao određeno vrijeme, ja Vas zaista molim da reagujete. Imamo ovdje dvije povrede Poslovnika. Dakle, gospodin Džaferović je, po pitanju replike govorio četiri minute, umjesto dvije, koliko mu Poslovnik dozvoljava, i druga stvar, ovo je bila diskusija, nije bila replika.”

Šefik Džaferović: “Gospodine Arnaut, ja sam dugo vremena izbjegavao da vodim polemiku s Vama, ali danas ste iskazali vrhunac Vašeg bezobrazluka i nekorektnosti. Niste, Vi, gospodine Arnaut, nikakva žrtva Šefika Džaferovića, niti je bilo ko žrtva Šefika Džaferovića. Ja se trudim i trudio sam se da poštujem Poslovnik, pogledajte malo stenograme svih sjednica Parlamenta, pa ćete onda moći sami zaključiti da je zapravo ovaj parlament žrtva Vaše ambicije da napredujete i da se zbog toga dopadnete svom šefu i sav je vic u tome.

Damir Arnaut: Vidite ovako, mislim Poslovnik vrlo jasno zabranjuje vrijeđanje poslanika i ovo što je gospodin Džaferović istakao po bilo čijoj definiciji predstavlja vrijeđanje i ja tražim u skladu s poslovničkom odredbom da ovo moje upozorenje o njegovom vrijeđanju uđe u zapisnik.”⁶

Tokom rasprave zaključke su predložili: poslanici iz Kluba SBB-a, Nikola Lovrinović, Hanka Vajzović, Momčilo Novaković, Senad Šepić i Denis Bećirović.

Dvadesetčetiri poslanika Predstavničkog doma PSBiH predložili su Deklaraciju, a poslanici iz Kluba SDS-a Dopunu Deklaracije.

Nakon rasprave, Dom se izjašnjavao o prijedlozima iznesenim u raspravi, kako slijedi:

Prijedlog zaključka poslanika Momčila Novakovića **nije usvojen**, s 13 glasova „za“ (iz Federacije BiH pet, iz Republike Srpske osam), 22 glasa „protiv“ i četiri glasa „suzdržan“, a on glasi: „*Predstavnički dom Parlamentarne skupštine BiH formira radnu grupu u kojoj su predsjedavajući klubova, koja će na osnovu stenograma s rasprave, predloženih zaključaka, Deklaracije i predloženih dopuna Deklaracije, te u konsultacijama s Vijećem ministara BiH i Predsjedništvom BiH dostaviti Predstavničkom domu eventualno usaglašen prijedlog bilo Deklaracije bilo zaključaka.*“

Prijedlog zaključka poslanika iz Kluba SBB-a **nije usvojen**. „Za“ je glasao 21 poslanik (iz Federacije BiH 20, iz Republike Srpske jedan), 11 je bilo „protiv“ i sedam „suzdržanih“. Predsjedavajuća je konstatala da nema potrebne entitetske većine. Kolegij kao komisija odmah je obavio usaglašavanje. Nije bilo saglasnosti. U drugom krugu glasanja, s 21 glasom „za“, 11 „protiv (iz Republike Srpske) i sedam glasova „suzdržan“, prijedlog zaključka nije usvojen, a on glasi: „*Predstavnički dom traži od Vijeća ministara BiH da u idućih 60 dana pokrene, odnosno intenzivira postupak ratifikacije Ugovora o državnoj granici između Bosne i Hercegovine i Republike Hrvatske, potpisan u Sarajevu 30.7.1999., a u skladu sa Zakonom o postupku zaključivanja i izvršavanja međunarodnih ugovora.*“

Zatim je predsjedavajuća dala na glasanje usvajanje Deklaracije, čiji su predlagači 24 poslanika Predstavničkog doma PSBiH. S 27 glasova „za“ (iz Federacije BiH 21, iz Republike Srpske šest), 11 glasova „protiv“ i jednim glasom „suzdržan“, **usvojio** Deklaraciju.

Dopuna Deklaracije, čiji su predlagači poslanici iz Kluba SDS-a **usvojena je** s 24 glasa „za“ (iz Federacije BiH 17, iz Republike Srpske sedam), 10 glasova „protiv“ i pet glasova „suzdržan“.

Nikola Lovrinović i Hanka Vajzović povukli su svoje prijedloge zaključaka.

Prijedlog zaključka Senada Šepića **nije usvojen**. „Za“ je glasalo 19 poslanika (iz Federacije BiH 18, iz Republike Srpske jedan), 17 je bilo „protiv“ i tri „suzdržana“. Predsjedavajuća je konstatala da nema potrebne entitetske većine. Kolegij kao komisija odmah je obavio

⁶ Izvod iz neautoriziranog transkripta 51. sjednice Predstavničkog doma PSBiH

usaglašavanje. Nije bilo saglasnosti. U drugom krugu glasanja, s 19 glasova „za“, 17 „protiv“ (iz Federacije BiH sedam, iz Republike Srpske 10) i tri glasa „suzdržan“, prijedlog zaključka nije usvojen, a on glasi: „Predstavnički dom Parlamentarne skupštine BiH poziva Predsjedništvo BiH da Parlamentarnoj skupštini BiH dostavi informaciju o svim aktivnostima i radnjama koje je preduzimalo u periodu od 2007. godine, kada je Predsjedništvo BiH u tadašnjem sastavu usvojilo stavove vezane za izgradnju Pelješkog mosta.“

Prijedlog zaključaka Denisa Bećirovića **nije usvojen**. „Za“ su glasala 22 poslanika (iz Federacije BiH 21, iz Republike Srpske jedan), 16 je bilo „protiv“ i jedan „suzdržan“. Predsjedavajuća je konstatala da nema potrebne entitetske većine. Kolegij kao komisija odmah je obavio usaglašavanje. Nije bilo saglasnosti. U drugom krugu glasanja, s 22 glasa „za“, 16 „protiv“ (iz Federacije BiH pet, iz Republike Srpske 11) i jednim glasom „suzdržan“, prijedlog zaključaka nije usvojen, a oni glase:

1. *Slobodna komunikacija neke obalne države između svojih voda i otvorenog mora nije isto što i njeno pravo na neškodljiv prolazak. Prvi pojam odnosi se na slobodu plovidbe i on je znatno većeg opsega nego što pruža institut neškodljivog prolaska stranih brodova.*
2. *Prije izgradnje Pelješkog mosta treba trajno riješiti određivanje granice na moru i kopnu bilateralnim međunarodnim ugovorom o granici, koji će podjednako i u dobroj vjeri primjenjivati obje strane ugovornice i koji će potvrditi oba parlamenta - i Hrvatski sabor i Parlamentarna skupština BiH.*
3. *Nužno je na međunarodno primjeren način utvrditi pravni način, pravni režim i širinu budućeg koridora koji će predstavljati vezu između bh. teritorijalnih voda i otvorenog mora Jadrana.*
4. *Predstavnički dom PSBiH konstatira da postoji međunarodni spor između dviju obalnih država (Bosna i Hercegovina i Hrvatska) koje dijele istočnu obalu Jadranskog mora. Zbog toga treba odabrati najprikladnije sredstvo za rješenje takvog spora s ciljem zadovoljenja obostranog interesa. Na tom putu treba odabrati najprimjerenija sredstva za mirno rješavanje sporova.*
5. *Predstavnički dom PSBiH zaključuje da se svim poslanicima i delegatima u Parlamentarnoj skupštini BiH dostavi odluka Stalnog arbitražnog suda u Hagu u predmetu Slovenija i Hrvatska.“*

Ad.8. Razmatranje poslaničke inicijative Nikole Lovrinovića koja glasi: „Na osnovu člana 8. Poslovnika Predstavničkog doma Parlamentarne skupštine BiH („Službeni glasnik BiH“, br. 79/14, 81/15 i 97/15), podnosim poslaničku inicijativu za uvrštavanje u dnevni red naredne sjednice Predstavničkog doma i Doma naroda Parlamentarne skupštine BiH tačku pod nazivom: „Izjašnjavanje domova Parlamentarne skupštine BiH o članu 7. st. (3) i (4) Poslovnika Parlamentarnog odbora za stabilizaciju i pridruživanje između Parlamentarne skupštine BiH i Evropskog parlamenta“, broj: 01-50-1-1508/17, od 16.6.2017.

Predsjedavajuća je dala uvodne napomene i otvorila raspravu. U raspravi su učestvovali: Nikola Lovrinović, Milica Marković, Denis Bećirović, Zaim Backović, Nermina Kapetanović, Aleksandra Pandurević, Damir Arnaut, Maja Gasal-Vražalica, Dušanka Majkić, Hanka Vajzović, Staša Košarac, Momčilo Novaković i Fehim Škaljić.

Predlagač inicijative Nikola Lovrinović predložio je i usvajanje dva zaključka, te da se o njima glasa posebno.

Prvi zaključak glasi: "Dom naroda i Predstavnički dom Parlamentarne skupštine BiH prihvataju član 7. Poslovnika Parlamentarnog odbora za stabilizaciju i pridruživanje između Parlamentarne skupštine i Evropskog parlamenta, koji glasi:

Na prijedlog Biroa Parlamentarnog odbora za stabilizaciju i pridruživanje, preporuke Odbora mogu se dati Evropskom parlamentu, Parlamentarnoj skupštini BiH, Vijeću ministara BiH, Vijeću za stabilizaciju i pridruživanje, Vijeću Evropske unije i Evropskoj komisiji.

Prijedlog preporuka utvrđuje Biro koncenzusom.

Svaki član Biroa, prije konačnog glasanja o preporukama Odbora, može zatražiti pauzu u svrhu usaglašavanja.

Amandmani na prijedlog preporuka i finalni tekst preporuka smatraju se usvojenim ako dobiju dvotrećinsku podršku prisutnih članova delegacije Evropskog parlamenta i dvotrećinsku podršku članova delegacije Parlamentarne skupštine BiH."

„Za“ je glasalo 20 poslanika (iz Federacije BiH 19, iz Republike Srpske jedan), 14 je bilo „protiv“ i pet „suzdržanih“. Predsjedavajuća je konstatirala da nema potrebne entitetske većine. Kolegij kao komisija odmah je obavio usaglašavanje. Nije bilo saglasnosti. U drugom krugu glasanja, s 24 glasa „za“, 13 „protiv (iz Federacije BiH jedan, iz Republike Srpske 12) i dva glasa „suzdržan“, prijedlog zaključaka **nije usvojen**.

Nikola Lovrinović odustao je od drugog prijedloga zaključka.

Ad.9. Razmatranje poslaničke inicijative Denisa Bećirovića koja glasi: „Na osnovu člana 8. Poslovnika Predstavničkog doma Parlamentarne skupštine BiH („Službeni glasnik BiH“, br. 79/14, 81/15 i 97/15), podnosim poslaničku inicijativu kojom se zadužuje Vijeće ministara BiH da u saradnji s entitetskim vladama, najkasnije u roku od šest mjeseci od dana usvajanja ove inicijative u Predstavničkom domu Parlamentarne skupštine BiH, sačini i u parlamentarnu proceduru dostavi prijedlog mjera efektivne zaštite domaće poljoprivredne proizvodnje u Bosni i Hercegovini“, broj: 01-50-1-1622/17, od 5.7.2017.

Predsjedavajuća je dala uvodne napomene i otvorila raspravu. Diskutirao je Denis Bećirović.

Predsjedavajuća je dala na glasanje poslaničku Inicijativu. „Za“ su glasala 22 poslanika (iz Federacije BiH 21, iz Republike Srpske jedan), 12 „protiv“, pet je bilo „suzdržanih“. Predsjedavajuća je konstatirala da nema potrebne entitetske većine. Kolegij kao komisija odmah je obavio usaglašavanje. Nije bilo saglasnosti. U drugom krugu glasanja, s 22 glasa „za“, 12 „protiv (iz Republike Srpske) i pet glasova „suzdržan“, Dom **nije usvojio** Inicijativu poslanika Denisa Bećirovića.

Ad.10. Razmatranje poslaničke inicijative Senada Šepića koja glasi: „U skladu s članom 8. Poslovnika Predstavničkog doma Parlamentarne skupštine BiH, predlažem da se u dnevni red prve naredne sjednice Predstavničkog doma Parlamentarne skupštine BiH obavezno uvrsti tačka pod nazivom: Informacija o realizaciji ranijih zaključaka i inicijativa o utvrđivanju najniže, zagarantirane cijene i sigurnog otkupa poljoprivrednih proizvoda u BiH, te prijedlog mjera za odgovor na ovu inicijativu“, broj:01-50-1-1623/17, od 5.7.2017.

Predsjedavajuća je dala uvodne napomene i otvorila raspravu. Diskutirao je Senad Šepić.

Predsjedavajuća je dala na glasanje poslaničku Inicijativu. „Za“ je glasao 21 poslanik (iz Federacije BiH 20, iz Republike Srpske jedan), sedam „protiv“, 11 je bilo „suzdržanih“. Predsjedavajuća je konstatala da nema potrebne entitetske većine, te će Kolegij kao komisija obaviti naknadno usaglašavanje.

Poslanik Senad Šepić predložio je u raspravi dva zaključka o kojima će se Dom izjašnjavati na narednoj sjednici, nakon izjašnjavanja o poslaničkoj inicijativi u drugom krugu glasanja.

Ad.11. Informacija predsjedavajućeg Vijeća ministara BiH Denisa Zvizdića o aktuelnom stanju i odnosu Vijeća ministara BiH prema Parlamentarnoj skupštini BiH, te odnosu prema parlamentarnoj većini, predlažak: poslanik Sadik Ahmetović, broj: 01-50-1-15-51/17, od 7.9.2017.

Predsjedavajuća je dala uvodne napomene i otvorila raspravu. Diskutirao je Sadik Ahmetović.

Na prijedlog Sadika Ahmetovića, Dom je s 20 glasova „za“ (iz Federacije BiH 13, iz Republike Srpske sedam), 18 glasova „protiv“ i jednim glasom „suzdržan“, **usvojio** zaključak koji glasi: „*Predstavnički dom Parlamentarne skupštine BiH zadužuje predsjedavajućeg Vijeća ministara BiH Denisa Zvizdića da do naredne sjednice prikupi potpise poslanika čiju podršku ima u svom radu kako bi se u narednom periodu mogao donijeti stav o statusu Vijeća ministara BiH.*“

Ad.12. Informacija o aktivnostima Agencije za nadzor nad tržištem BiH, materijal Zajedničke komisije za ekonomske reforme i razvoj, broj: 03/3-50-14-9-12-3/17, od 12.6.2017.

Predsjedavajuća je dala uvodne napomene i otvorila raspravu. Prezentaciju aktivnosti Agencije za nadzor nad tržištem BiH izvršio je zamjenik direktora Agencije Dražen Primorac. U raspravi su učestvovali: Dušanka Majkić, Damir Arnaut, Zaim Backović i Safer Demirović.

S 13 glasova „za“ (iz Federacije BiH 12, iz Republike Srpske jedan), 24 glasa „protiv“ i dva glasa „suzdržan“, Dom **nije primio k znanju** Informaciju o aktivnostima Agencije za nadzor nad tržištem BiH.

Ad.13. Prijedlog zaključka o osnivanju Privremene zajedničke komisije oba doma Parlamentarne skupštine Bosne i Hercegovine za provođenje procedure imenovanja Nezavisnog odbora i Odbora za žalbe građana kao nezavisnih tijela policijske strukture Bosne i Hercegovine, predlagač: Zajednički kolegij oba doma Parlamentarne skupštine BiH, broj: 01,02-34-1-1893/17, od 31.7.2017.

Predsjedavajuća je dala uvodne napomene i otvorila raspravu. U raspravi su učestvovali: Denis Bećirović, Damir Arnaut, Aleksandra Pandurević, Zaim Backović, Mladen Bosić, Nikola Lovrinović, Dušanka Majkić, Šefik Džaferović i Salko Sokolović.

Sa 16 glasova „za“ (iz Federacije BiH 10, iz Republike Srpske šest), 21 glasom „protiv“ i jednim „suzdržan“, Dom **nije usvojio** Prijedlog zaključka o osnivanju Privremene zajedničke komisije oba doma Parlamentarne skupštine Bosne i Hercegovine za provođenje procedure imenovanja Nezavisnog odbora i Odbora za žalbe građana kao nezavisnih tijela policijske strukture Bosne i Hercegovine.

Ad.14. Prijedlog zaključka o formiranju Interresorne radne grupe za izradu Zakona o ispitivanju porijekla imovine zvaničnika u institucijama Bosne i Hercegovine, predlagač: Zajednički kolegij oba doma Parlamentarne skupštine BiH, broj: 01,02-34-1-1894/17, od 31.7.2017.

Predsjedavajuća je dala uvodne napomene i otvorila raspravu. U raspravi su učestvovali: Damir Arnaut, Nikola Lovrinović, Aleksandra Pandurević i Sadik Ahmetović.

Sa 16 glasova „za“ (iz Federacije BiH 10, iz Republike Srpske šest), 19 glasova „protiv“ i tri glasa „suzdržan“, Dom **nije usvojio** Prijedlog zaključka o formiranju Interresorne radne grupe za izradu Zakona o ispitivanju porijekla imovine zvaničnika u institucijama Bosne i Hercegovine.

Ad.15. Davanje saglasnosti za ratifikaciju Sporazuma o zajmu (Projekat podrške zapošljavanju) između Bosne i Hercegovine i Međunarodne banke za obnovu i razvoj, materijal broj: 01,02-05-2-1546/17, od 22.6.2017.

Predsjedavajuća je dala uvodne napomene i otvorila raspravu. Nije bilo prijavljenih.

Dom je, s 37 glasova „za“ (iz Federacije BiH 24, iz Republike Srpske 13), bez glasova „protiv“ i jednim glasom „suzdržan“, **dao saglasnost** za ratifikaciju Sporazuma o zajmu (Projekat podrške zapošljavanju) između Bosne i Hercegovine i Međunarodne banke za obnovu i razvoj.

Ad.16. Davanje saglasnosti za ratifikaciju Sporazuma između Vijeća ministara Bosne i Hercegovine i Vlade Republike Makedonije u procesu pristupanja Evropskoj uniji, broj: 01,02-05-2-1902/17, od 31.7.2017.


Predsjedavajuća je dala uvodne napomene i otvorila raspravu. Nije bilo prijavljenih.

Dom je, s 36 glasova „za“ (iz Federacije BiH 24, iz Republike Srpske 12), jednim glasom „protiv“ i jednim „suzdržan“, **dao saglasnost** za ratifikaciju Sporazuma između Vijeća ministara Bosne i Hercegovine i Vlade Republike Makedonije u procesu pristupanja Evropskoj uniji.

Sjednica je završena u 17,20 sati.

Sastavni dio Zapisnika je transkript 51. i nastavka 51. sjednice Predstavničkog doma.

SEKRETAR
PREDSTAVNIČKOG DOMA

Marin Vučković


PREDSJEDAVAJUĆA
PREDSTAVNIČKOG DOMA

Borjana Krišto



Napomena: Prvi dio 51. sjednice, održan 7.9.2017., završen je u 18,00 sati. Na nastavku 51. sjednice, održanom 13.9.2017., razmatrane su tačke 7. – 16. usvojenog dnevnog reda i obavljeno glasanje o svim tačkama. Nastavak sjednice počeo je u 10,10 sati.